

Morning Dogri News Bulletin

19-02-2018, 09:20 Hrs.

मार्निंग डोगरी न्यूज बुलेटिन

तरीक 19-02-2018

समां 0920 Hrs.

- पाकिस्तानी सेना पासेआ संघर्ष विराम गी खलाफवजी, पुंछ जिले च नियंत्रण रेखा पर आतंकवादियें दी घुसपैठ करोआने दे मकसद कन्नै कीती भारी गोलीबारी कीती।
- केन्द्री मंत्री राजनाथ सिंह होरें जम्मू-कश्मीर दे नौजवानें गी एकता दा सनेआ फ़ैलाने लेई आक्खेआ ऐ।
- मुख्यमंत्री महबूबा मुफती होरें आक्खेआ ऐ जे रयासतै गी बेययकीनी ते यक्को-तक्की आले हालात शा बाहर कड्डने लेई रमानदारी दा बहाल होना अत लाजमी ऐ। उनें रमानदारी बहाल करने च लोकें कोला सहयोग मंगेआ।
- रयासती सरकार उनें लोकें दी नमीं लिस्ट त्यार करोग जिंदे कश अपना मकान नेंई ऐ, तां जे इंदी प्रधानमंत्री आवास योजना लेई सफारश कीती जाग।

<><><><><><>

Ceasefire

पाकिस्तानी फौजै इक बारी फही जंदी संझां पुंछ जिले च कब्जा रेखा पर घुसपैठ करोआने दे मकसद कन्नै भारी गोलाबारी कीती ऐ। रक्षा सुत्तरें आकाशवाणी गी दस्सेआ जे पाकिस्तानी फौजै कल संझां कोई 5 बजे दे करीब पुंछ जिले च कब्जा रेखा कश गुलपुर सैक्टर च लौहके ते आटोमेटिक थेहारें दे अलावा मोटरें राएं बिजन कुसै इश्तेयाल दे गोलाबारी शुरु कीती। बन्ने पर तैनात सौहगे भारती जवानें बी उंदी इस गोलाबारी दा मुंहतोड़ परता दित्ता। दौनें बक्खी दा गोलाबारी किश चिरै लेई जारी रेई। एहदे परैन्त इलाके च तपाशी अभियान बी चलाया गेआ।

रक्षा प्रवक्ता नै आखेआ ऐ जे फौज नै बन्ने पर नेड़मी निगरानी रक्खी दी ऐ ते जवान, पाकिस्तान दे माड़े इरादें गी नाकाम बनाने गितै पूरी चाल्ली तैयार न।

<><><><><><>

Rajnath-Youth

केन्द्री गृह मंत्री राजनाथ सिंह होरें कल नमीं दिल्ली च 'वतन को जानो' प्रोग्राम तैहत उत्थे गेदे रिआसत जम्मू कश्मीर दे नौजवानें कन्नै मुलाकात कीती। इस प्रोग्राम दे तैहत रिआसत दे कोई 200 नौजवानें गी 11 थमां 20 फरवरी तोहड़ी देसै दिएं बक्ख-बक्ख थाहरें दे दौरे पर लेता गेदा ऐ। नौजवानें गी संबोधित करदे होई केन्द्री गृह मंत्री राजनाथ सिंह होरें उनें आखेआ जे ओह अपने दोस्तें ते रिश्तेदारें कन्नै अपने तजुर्बे सांझे करियै एकेऽ दा संदेश फैलान। श्री सिंह होरें आखेआ जे इस दौरे दे कन्नै नौजवानें गी आधुनिक भारत दे विकास गी दिक्खने दा मौके थोग। प्रधानमंत्री हुंदे दफतरै च केन्द्री राज्यमंत्री डाक्टर जतिन्द्र सिंह ते केन्द्री गृह राज्यमंत्री किरन रिजिजू होरें बी इनें नौजवानें कन्नै गल्लबात कीती। इक सरकारी विज्ञप्ति मुजब, रिआसत जम्मू कश्मीर दे नौजवानें गी देसै दे होरनें हिस्सें च होआ'रदी सांस्कृतिक ते समाजी-आर्थिक गतिविधिएं बारै जानकार बनाने दे मकसद कन्नै केन्द्री गृह मंत्रालय नै 'वतन को जानो' प्रोग्राम दा आयोजन कीते दा ऐ।

<><><><><><>

CM -Peace

मुख्यमंत्री महबूबा मुफती होरें जम्मू-कश्मीर गी मजूदा यक्को-तक्की आले हालात शा बाहर आनने लेई रमानदारी गी सब्बने शा लाजमी करार दिंदे होई लोकें अग्गे अपील कीती ऐ जे ओ रयासतै च रमानदारी बनाई रक्खने च सहयोग देन, तां जे ओ गल्लबात ते सुलह-सफाई आले अपने एजंडे गी संदोखजनक ढंगै नै अगड़े बधाई सकन। कल कुंड देवसर च इक जनसभा गी सम्बोधित करदे होई मुख्यमंत्री होरें लोकें गी आखेआ जे ओ रयासतै च रमानदारी बनाए रक्खने दी प्रक्रिया च अपना योगदान देन, तांजे सुलह-सफाई ते गल्लबात आलियें कोशतें गी अगड़े बधाया जाई सकै ते नियंत्रण रेखा दे रोआर-पार होर मते रस्ते खोले जाई सकन, जिंदे च करगिल सकर्दू, जम्मू सयाल कोट, नशैहरा-झंगड़ वगैरा शामिल न, तां जे दौने बक्खी दे लोक किट्ठे रलिये विकास बाददे ते बत्तै पर अगड़े बधी सकन। मुख्यमंत्री होरें आखेआ जे बन्ने पार

हालात खरे या दिल बधाने आले नेई ऐन, कीजे आए दिन उत्थुआं लोकें दी मौत ते तबाही दिआं खबरां इन्ने बारी औंदिआं न जे उत्थें ग्राएं थमां बंकर बनोआने दी मंग औंदी रोहन्दी ऐ, जेडी जे इक मंदे भागें आली गल्ल ऐ।

<><><><><><>

CM-Development

मुख्यमंत्री महबूबा मुफ्ती होरें कल कश्मीर च कुन्ड इलाके दे दौरे दरान किश महत्वपूर्ण विकास प्रोजेक्टें दे नीह पत्थर रक्खे। मुख्यमंत्री होरें कल मशहूर बराजलू पुलै दा नीह पत्थर रक्खेआ जेहदे पर अंदाजन 28 करोड़ 64 लक्ख रुपें दी लागत औग ते एहदा निर्माण त्रौं बरें दे अंदर कीते जाने दी मेद ऐ। महबूबा होरें श्रीनगर गी शोपियां ते काजीगुंड कन्नै जोडने आहले राष्ट्री जरनैली सिडक नम्बर 444 गी चैडा करने सरबंधी महत्वकांक्षी परियोजना गी बी शुरु करोआया जेहदे उप्पर 1 खरब 8 अरब रुपें दी लागत औग। मुख्यमंत्री होरें नगरेस ग्रां च जनजातीयें सरबंधी उप-योजना दे तैहत आदर्श ग्रां ते 100 बिस्तरें दी समर्थ आहले गुज्जर-बक्करवाल होस्टल दा नीह पत्थर बी रक्खेआ जिसी अगले बरे दे अखीरै तक्कर तैयार करी दित्ता जाग। एहदे अलावा मुख्यमंत्री होरें कुन्ड च आई.टी.आई. इमारत दा बी नीह पत्थर रक्खेआ। इस मौके पर लोकें कन्नै गल्लबात करदे होई मुख्यमंत्री होरें कम्म तोढ चाढा'रदी एजेसिएं गी निर्देश दित्ते जे ओह निर्धारित समे-सीमा दे अंदर-अंदर इनें प्रोजेक्टें गी सबूरा करोआना यकीनी बनान।

<><><><><><>

Dy. CM- Agriculture

उपमुख्यमंत्री डा. निर्मल सिंह होरें आक्खेआ ऐ जे प्रधानमंत्री हुंदे आसेआ राई-बाई दे क्षेत्रें च कीते गेदे हीले ते पैहलकदमिआं अपने आपै च ऐतिहासिक न, जिंदे नै करसान फसलें थमां मता ते बेहतर झाड़ हासल करी सकगंन ते उंदी औंदन च बाददा होग, उंदे रैहन-सैहन दा स्तर बी उबड़ा चकोग ते मुख्य बी खाद्य उत्पादन दे क्षेत्रें च आत्म-निर्भर बनी जाग। उपमुख्यमंत्री होर कल केरल दे थिरुवनन्तपुरम च वेलायनी देवी मंदिर मैदान च लोआए गेदे राष्ट्रीय केला उत्सव दरान बोला'रदे हे। डा. निर्मल सिंह होरें गलाया जे राई-बाई दे क्षेत्रें च नमियें ते साईसी काहड़े दे इस्तमाल कन्ने कृषि उत्पादन च बाददा होग ते करसान समुदाय गी इनेंगी जरूर

अपनाना लोडचदा। जम्मू-कश्मीर सलाहकार बोर्ड दे उप-प्रधान दलजीत सिंह चिब होर बी इस उत्सव च शामिल होए।

<><><><><><>

PMAY

ग्रामीण विकास ते पंचैती राज मंत्री अब्दुल हक होरें कल आखेआ जे सरकार रियासता दे बेघर लोकें दी नमें सिरेआ इक सूची तैयार करोग तांजे उंदे मामले गी प्रधानमंत्री आवास योजना लेई केन्द्र सरकार अगगे रखेआ जाई सकै। इस सरबंघै च मंत्री होरें सरबंघत अफसरें गी निर्देश दित्ते न जे ओह बेघर लोकें दी शिनाख्त लेई ग्राम सभाएं गी कम्म पर लान। उनें मैहकमे गी निर्देश दित्ते जे ओह 15एं दिनें दे अंदर एह सूची तैयार करने दा कम्म पूरा करन। मंत्री होरें साम्बा जिले च प्रधानमंत्री आवास योजना तैहत बनाए जा'रदे घरें दे नीह पत्थर रखने परैन्त एह जानकारी दित्ती। इस मौके स्हाड़े संवाददाता सतपाल शर्मा कन्नै गल्लबात दौरान उनें दस्सेआ

<><><><><><>

Highway

जम्मू-श्रीनगर राष्ट्री जरनैली सिड़क रामबन जिले च किश थाहरें पस्सियां पौने कारण गडिडएं दी आओजाई लेई फिलहाल बंद ऐ। ऊआं स्हाड़े जिला संवाददाता नै जानकारी दित्ती ऐ जे सिड़क परा मलबा हटाने दा कम्म जोरें शोरें कन्नै जारी ऐ ते एहदे तौले गै खुल्ली जाने दी मेद ऐ:—

<><><><><><>

Weather

औने आलें दिने च रियासता च मौसम इक बारी फही करवट लेई सकदा ऐ ते कल्लै थमां, 25 तरीक तक्क किश थारें ताजा बर्फकारी ते बरखा होई सकदी ऐ। इस बारै स्हाड़े संवाददाता चंद्रकांत शर्मा कन्नै गल्लबात करदे होई जम्मू-कश्मीर मौसम विभाग दे निदेशक Sonam Lotus होरें दस्सेआ:—

<><><><><><>

Red Cross-DGP

रिआसती पुलसा दे डरैक्टर जनरल डाक्टर एस.पी. वैद होरें आखेआ ऐ जे कुसै कुदरती क्रोपी दौरान लोकें दी मदाद लेई सभनें शा पैहले अगगे औने आहलें चा रेडक्रास सभनें शा प्रमुख ऐ। उनें आखेआ जे रिआसती पुलस सदा गै इस संगठन दी मदाद ते सैहयोग गितै तैयार ऐ। डाक्टर वैद होर कल गुलशन ग्राउंड जम्मू च रेडक्रास मेले दे समापन समारोह दौरान बोला'रदे हे। इस मौके उनें लक्की ड्रा दे जेतूणं गी ईनाम बी बंडडे।

PM-Award

रिआसत जम्मू कश्मीर दे बडगाम जिले गी रिआसता च बिजन नगदी आहली अर्थबवस्था गी बढावा देने लेई सार्वजनिक प्रशासन आहले खेत्तर च प्रधानमंत्री हुंदे उत्कृष्टता अवार्ड लेई तालेआ गेआ ऐ। अजें तोहड़ी जिले च 6 सौ 70 थाहरें पर डिजिटल भुगतान आहलिआं बवस्थां कायम कीतीआं गेदिआं न। इंदे च 3 सौ 72 राशन दिआं हट्टिआं, 2 सौ 85 हैलें दिआं हट्टिआं ते राजस्व मैहकमे दे 13 तैहसील तफतर शामिल न। एहदे अलावा जिले च मौजूदा माली ब'रे दौरान डिजिटल तरीके राणं बिजली दे बिलें दे राजस्व च 8 सौ फीसद बाददा बी दर्ज कीता गेआ ऐ। ध्यानजोग ऐ जे रिआसत थमां इस बारी इस प्रतिष्ठित अवार्ड लेई छडे दौं जिलें गी गै तालेआ गेआ ऐ जिंदे च श्रीनगर ते बडगाम शामिल न।

<><><><><><>